

## **Biryara (dadgeha destûrî) ronîya dil û mêjiyê kurdan tarî nake.**

**Mihemed ELÎ**

[efrin2612@hotmail.com](mailto:efrin2612@hotmail.com)

Biryara ku (dadgeha destûrî li Tirkiyê) roja îne 11.12.2009 derxist û pê partiya DTP girt, biryareke durû û regezperest e. Ev biryar xelegeke berdewam ji xelekên tepisandina dengê gelê Kurd e! Helwesta Tirkan jî li dijî gelê Kurd helwesteke seyr û bêgane ye, ji roja ku ew hatine rojhilata navîn ew dijmantiya Kurdan dikin. Ji hingê ve ew amade ne hevkarîya herkesî, ji bo xatirê qirkirina gelê Kurd, bikin, tevî ku Kurdan her û her camêrî bi wan re kirine, lê *nanê Tirkan li kabê ye!!* Mîsliman, çep, rast, jor, jêr... hemû rengên siyaseta Tirkan li dijî Kurdan in!



Tiştê ku roja îne jî qewimî di heman çarçiweyê de ye. Girtina DTP ne wek ku Tirk angaşt dikin ji ber ku DTP alîgirê PKK'ê ye û bûye kosp di rêya çareserîya gelê Kurd de. Ja rast ew e, ku DTP dengê holman û wîjdana gelê Kurd e, wîjdana ku dewleta Tirko dixwaze li gorî dilê xwe şewaz bike û ji Ewropîyan re bêje 'vaye min pîrsgirêka Kurdan çareser kir, êdî deriyê xwe ji min re vekin, êdî ez li ber deriyê we perîşan bûme û nîşanên kiryarên min bi hevîyaza (tercîha) we bi hemû gelên vê dewletê (Tirkiyê) kirine, derdikevin holê û dê min û we ve riswa bikin'.

Behaneya biryara girtina DTP ew e, ku DTP û PKK derfêten çareserkirina pîrsgirêka Kurd li tirkiyê asteng dikin! Kesên ku heyîna gelê Kurd nepejirînin ji xwe napejirînin, lê kesên ku ji ber sedemên min li jor gotine vê heyîne wek daqurtandina jehrê dipejirînin jî, dibêjin, ku DTP û PKK ne nûner û berdevkên gelê Kurd in. Ew bi angaştê xwe de pê de diçin û dibêjin ku, ne ji wan bûya, pîrsgirêka Kurd ê ji zû ve çareser bûbûya!! Gelo ev çend sal in PKK dest avêtiye çekan û derketiye serê çiyayên Kurdistanê ji bo heyîna û rûmeta gelê Kurd biparêze? Ev çend sal in derfetên wisa nefsbîçûk di bin sîwana çavdêriya teng a dewleta Tirko de ji Kurdan re peyda bûne, heya dengê xwe ji bo nizimtirîn mafên Kurdan bi rêya partiyên siyasî bilind bikin?

Ev 80 sal in dewleta Tirko gelê Kurd bênavber dikuje, koç dîke û rûmeta wî bin pê dîke. Berî PKK û DTP çend bizavên mitmane û jidil ji hêla tirkan ve sebarek bi çareserkirina pîrsgirêka gelê Kurd derketine holê? Ew neheqîya ku dewleta kor li dijî Kurdan bi cih danî û bi hezaran ciwanên Kurd kuştin, gundên Kurdan şewandin û kavi kirin û best û zozanên wan mezixandin, îro ji xwe re li rûyekî zagonî û bêperwa digere. Îro serokê dewleta Tirko ( ku jixwe felsefeya partiya wî ji Îslametiya tirkan tê) dibêje ,her kes divê rêz ji biryara dadgehê re bigire! Gelo ev neheqî û zînata ji kesekî xwedî bilindtirîn diyarok di dewleta tirkan de derkeve holê, gelê Kurd ê bi çi rengî bawerîya xwe bi hemû pergala vê dewletê bîne?

Îro bi fermana generalên ku di nizimtirîn rêza Masoniyan de ne û hemû mofirkên jiyane di dewleta tirko de di destên wan de ne, biryara girtina DTP derket û vaye def û niqarên şer ji nû ve lêdikevin. Ev kesên navborî û salarên wan di rêzên bilind ên Masoniyê de ji ber arîşeya aborî li cîhanê dinalin û pêwîsîti bi firotina çekan heye, çek jî dîsa şeran dixwazin, şer jî bi van biryarên bêdad û sorbar derdikevin holê... Gelê Kurd jî bi dehan caran gotiye em şer naxwazin, daxwaza me aşitî, azadî û biratî ye, lê dema ku em têkevin eniya xweparatina rewa em jî dikarin êdî li gorî reftarên dijmin bersivê bidin...

Reng e (dadgeha destûrî li Tirkiyê) dengê partiyekî Kurdan ji hêla siyasî ve birî, lê gelo kî dê bikaribe dil û mêjîyê Kurdan, ku bi tîşkên azadî û şiyarbûnê ronê bûne ji nû ve kor bike??